



## Terenga 3: Hōtaka 18 - Whakamārama Take

Nau mai, haere mai ki te kāinga o Ako. Herea mai te taukaea o ōu nā manako ki te reo ki te pou o whakaaro nui, o ngākau nui, o aroha nui kua titia ki tēnei papa.

### Hei Mahi Whakarongo

Ka rongo tātou ki ngā whakaaro o Scotty Morrison e pā ana ki te reo me te whakaaro Māori ā kō ake nei. Anei ngā pātai hei whakautu mā koutou:

- 1) Ki te kore te reo e panoni, ka aha?
- 2) He aha tētehi o ana whakatūpatotanga ki a tātou?
- 3) He aha te tikanga o te kupu 'whakahōtaetae'?

Kia whakarongo ake tātou ki te uri o Tamatekapua, ki a Scotty Morrison.

### He Whakamārama

Tirohia ngā rerenga e whai ake nei me ngā whakautu ki ngā pātai.

- **I te korenga ōna i tae mai, e mokemoke nei te whānau.**
  1. He aha te take kei te mokemoke te whānau? *Kāore ia i tae mai.*
  2. Ko wai kei te ngaro? *Ko ia.*
  3. Kei whea te kaikōrero? *Kei te taha o te whānau.*
- **I te korenga o tana pāpā e tae mai ki tana mārena, ka heke ngā roimata.**
  1. Ka tae mai te pāpā? *Kāore.*
  2. He aha te take e tangi ana ia? *Nā te mea kāore tana pāpā e tae mai ki tana mārena.*
  3. He aha tētehi atu rerenga ōrite ana ki tēnei te tikanga, engari e tīmata ana ki te kupu 'Nā' *Nā te mea kāore tana pāpā e tae mai ki tana mārena, ka heke ngā roimata.*

Ka kitea i roto i ngā tauria e whai ake nei te rerekētanga o te 'e' me te 'i' i roto i tēnei whakatakotoranga:

- E pōuri ana i te korenga o mātou e tae atu *I'm sad because we won't make it.*
- E pōuri ana i te korenga o mātou i tae atu *I'm sad because we didn't make it.*

E noho ana tēnei kiānga hei 'TAKE' i kore ai tētehi āhuetanga i tutuki.

### Hei Mahi

Anei ētehi 'take' i kore ai i tutuki tētehi āhuetanga. Tuhia he rerenga kōrero e whakamahi ana i te kiānga 'i te korenga...'

1. kāore te Kaunihera i whakapāha ki te hapori
2. kāore ngā tamariki i whakarongo ki ngā tohutohu
3. kāore taku karere i tae atu
4. kāore te kuia e tae atu ki te hui
5. kāore e heke te ua āpōpō

### He Whakautu:

1. I tū ngā pihi o te hapori i te korenga o te Kaunihera i whakapāha.
2. I kohetengia ngā tamariki e te kaiako i te korenga o rātou i whakarongo ki ana tohutohu.
3. Kāore rātou i mōhio i whea ahau i te korenga o taku karere i tae atu.
4. E pāpōuri ana te whānau i te korenga o te kuia e tae atu ki te hui.
5. I te korenga o te ua e heke āpōpō, kua haere tāua ki te hī ika.